

**ANG****Bayan**

Pahayagan ng Partido Komunista ng Pilipinas  
Pinapatnubayan ng Marxismo-Leninismo-Maoismo

Taon XLI Blg. 1  
Enero 7, 2010  
[www.philippinerevolution.net](http://www.philippinerevolution.net)

*Editorial*

## Itaas ang antas ng digmang bayan sa bagong dekada

**N**asa solidong katayuan ngayon ang Partido Komunista ng Pilipinas, Bagong Hukbong Bayan (BHB) at rebolusyonaryong mamamayan para maisulong ang digmang bayan sa bagong dekada sa antas na di pa nito naaabot sa nakaraan.


Pinakamatibay na batayan nito ang naipong lakas, karanasan at maging na tagumpay ng digmang bayan nitong nakaraang mahigit apat na dekada, at ang higit pa nitong pagkakapanday bunga ng matagumpay na pagharap at pagbigay sa sa tolong gera at Oplan Bantay Laya ng rehimeng US-Arroyo nitong katatapos na dekada.

Nagdudulot ng higit pang paborableng obhetibong kundisyon para sa ibayong pagsulong at malalaking pag-igpaw ng rebolusyong Pilipino ang pagkaka-sadlak sa depresyon ng pandaigdigang sistemang kapitalista at lalong pagkakabaon sa permanenteng krisis ng malakolonyal at malapyudal na sistema sa Pilipinas.

Determinado ang Partido at lahat ng rebolusyonaryong pwersa na gampanan ang mga tungkulin upang umigpaw nang malaki ang digmang bayan sa unang limang taon ng bagong dekada mula sa yugto ng estratehikong depensiba tungo sa estratehikong pagkapatas.

Sa pagharap sa malaking hamong ito, maraming paghahanda at pagsisikap ang dapat pursigidong isagawa ng lahat ng mga kadre, kasapi, mandirigma, aktibista at rebolusyonaryong mamamayan.

Una sa lahat, dapat higit na palakihin at palakas ang Partidong namumuno sa rebolusyonaryong kilusan. Dapat pag-ibayuhin ang pagrerekutal laluna sa hahay ng mga manggagawa, iba pang masang anak-



***Mga tampok sa isyung ito...***

**Progresibong lider-masa, sumukob sa BHB**  
PAHINA 5

**Tropa ng 16th IB, inambus sa Quezon**  
PAHINA 6

**Hamon sa dominasyon ng dolyar sa Latin Amerika**  
PAHINA 10

pawis at petiburgesya. Hubugin mula sa kanila ang ilampung libong proletaryong rebolusyonaryong makapagtuturo at makapamumuno sa pagrerebolusyon ng sambayanang Pilipino. Maagap na armas sila ng tatlong antas na edukasyong pam-Partido at tuluy-tuloy na hasain sila sa Marxista-Leninista-Maoistang paninindigan, pananaw at pamamaraan. Maagap na itatag ang mga sangay, grupo at nakatataas na antas ng pamumuno sa Partido sa mga nakikilusang lokalidad at organisasyon, at mga kinakailangang saklaw ng gawain.

Tuluy-tuloy na sanayin ang libu-libong kadreng maaasahan sa epektibong pamumuno mula sa pinakabatayan hanggang sa pambansang antas. Napakahalagang mapasigla ang pagpapadala ng mga kadre at potensyal na kadre mula sa mga lunsod at sentrong bayan para sumanib sa hukbong bayan. Sa kanayunan pinakakinakailangan ang pinakamaraming dagdag na kadre na may maunlad na katangiang proletaryo at mataas na intelektwal at iba pang kasanayan.

Dapat lalong pahasayin, paramihin at mapangahas na ilarga sa mga gawain ang daan-daan libong

mga aktibistang masa. Sa pamamagitan nila, ilang ulit na napalalaki ang kakayahan ng Partido at hukbong bayan na saklawin, pukawin, organisahin at pakilusin ang masang anakpawis at iba pang sektor ng mamamayan sa kanayunan at kalunsuran, kapwa sa lihim at hayag na paraan.

Ibayong paigtingin ang malaganap at masinsing pakikidigmang gerilya batay sa papalawak at papalalim na baseng masa. Nagagawa na ng Bagong Hukbong Bayan ang maglunsad ng mahigit isang taktikal na opensiba bawat araw. Mahihigitan ito sa mga darating na taon sa ibayong pagpapalaki at pagpapahusay pa ng ating hukbong bayan at sa pagsasamantala sa mga kaguluhan at kahinaan sa panig ng kaaway. Paduguin nang husto ang kaaway sa ulo at katawan at padagundungin ang mga aksyong militar ng BHB sa buong kapuluan.

Dapat palakas ang rekrutment sa hukbong bayan mula sa daan-daan libong aktibista at rebolusyonaryong mamamayan sa kanayunan at kalunsuran. Paghusayin ang kanilang konsolidasyon sa ideolohiya, pulitika at militar upang lalo silang makapagpunyagi sa mataga-

lang digmang bayan at magsilbing balon ng mahuhusay na kadre ng Partido at Pulang kumander ng hukbong bayan.

Gawing lakas-kumpanya ang malaking mayorya ng mga larangang gerilya at sikaping buuin ang tig-isang platun bilang saligang yunit ng hukbong bayan sa kalakhan ng nasasaklaw na mga munisipalidad. Tiyakin ang pagtatayo ng mga yunit ng milisyang bayan at higit na maraming kwerpo sa pagtatanggol-sa-sarili sa mga nakokonsolidang baryo. Maaaring magdeploy ng mga armadong partisano sa mga lunsod na saklaw ng mga larangang gerilya. Masusing pag-aralan, masinop na paghandaan at mabisang labanan ang panibago at mas patitindihin pang kontra-rebolusyonaryong oplang ipapalit sa nabigong OBL.

Layunin ng kasalukuyang malaganap at masinsing pakikidigmang gerilya ang tuluy-tuloy at kumulatibong paghigop ng lakas ng kaaway sa pamamagitan ng paparaming bira, laluna sa mahihina at nahihawalay na bahagi nito.

Sa mga rehiyon at larangang gerilyang may kahandaan na, maaaring unti-unting paunlarin ang angkop na mga bertikal na pwersa ng hukbong bayan at isulong ang ilang panimulang elemento ng regular na pakikidigmang makilos sa proseso ng pagpapalaganap, pagsisinsin at pagtataas ng antas ng pakikidigmang gerilya. Magsisilbi ang mga itong madulas na transisyon tungong ganap na regular na pakikidigmang makilos na siyang pangunahing anyo ng pakikidigma sa yugto ng estratehikong pagkapatas.

Paalun-alon nating palawakin at sinsinin ang rebolusyonaryong baseng masa. Paramihin at patatagin ang ilang milyong mamamayang kasalukuyang bumubuo nito. Pursigido nating itayo ang nagtatalikurang mga larangang gerilya



Taon XLI Blg. 1 Enero 7, 2010

Ang *Ang Bayan* ay inilalabas sa wikang Pilipino, Bisaya, Iloko, Hiligaynon, Waray at Ingles.

Maaari itong i-download mula sa Philippine Revolution Web Central na matatagpuan sa:

[www.philippinerevolution.net](http://www.philippinerevolution.net)

Tumatanggap ang *Ang Bayan* ng mga kontribusyon sa anyo ng mga artikulo at balita. Hinihikayat din ang mga mambabasa na magpaabot ng mga puna at rekomendasyon sa ikauunlad ng ating pahayagan. Maaabot kami sa pamamagitan ng email sa: [angbayan@yahoo.com](mailto:angbayan@yahoo.com)

## Nilalaman

<b>Editorial</b>	
Itaas ang antas ng digmang bayan	1
Anibersaryo ng PKP	4
Lider-masa, sumukob sa BHB	5
AFP, bigo sa Samar	5
<b>Matatagumpay na opensiba</b>	
Ambus sa Cagayan Valley	6
Tropa ng 16th IB, tinambangan	6
Mga tagumpay sa Panay	6
Rebolusyong agraryo sa Caraga	7
Lider-Lumad, pinaslang	7
Pagbabago ng klima	8
Raling iglap, inilunsad ng MSP	9
<b>Sa ibayong dagat</b>	
Hamon sa dominasyon ng dolyar	10
Kasaysayan ng ALBA	11
Effigy ni Obama, sinunog	11
<b>Balita</b>	12

Ang *Ang Bayan* ay inilalathala dalawang beses bawat buwan ng Komite Sentral ng Partido Komunista ng Pilipinas

sa karamihan ng mga distritong kongresyunal sa kanayunan na di pa nasasaklaw ng kasalukuyang humigit-kumulang 120 larangang gerilya. Sinsinin ang mga ito hanggang sa masaklaw ang nakararaming munisipalidad dito.

Napakahalagang mapalawak at mapasigla ang rebolusyong agraryo. Dapat na palakas ang rebolusyonaryong baseng masa sa larangan ng organisasyon, pulitika, militar, ekonomya, kagalingang publiko at kultura. Mula sa milyun-milyong mamamayang abot nito, makapagrerek-luta tayo ng pinakamaraming dagdag na pwersa ng Partido, hukbong bayan at iba't iba pang organisasyong masa.

Tuluy-tuloy nating iangat ang antas ng konsolidasyon ng rebolusyonaryong baseng masa sa lahat ng lugar at itatag ang mga demokratikong organo ng pamahalaan ng bayan at iba pang organo ng kapangyarihang pampulitika sa mga nakokonsolidang saklaw mula sa baryo, munisipalidad at distrito pataas. Dapat ilarga ang sariling pag-oorganisa at demokratikong paggugubyrno ng mamamayan sa gabay ng mga lokal na organisasyon ng Partido sa mga konsolidadong baseng gerilya. Bibigyan nito ang Partido at hukbong bayan ng malaking kaluwagan para harapin ang iba pang gawain, kabilang na ang ibayong pagsusulong ng armadong pakikibaka.

Sa kalitabong pagtataas ng antas ng konsolidasyon ng rebolu-

syonaryong baseng masa at paglansag ng kapangyarihang pampulitika ng kaaway sa malalawak na lugar, tinatanaw natin ang pagusbong ng mauunlad at relatibong matatatag na rebolusyonaryong base at larangan ng digma, habang umaabante ang digmang bayan mula sa maunlad na yugto ng estratehikong depensiba patungo sa yugto ng estratehikong pagkapatas.



masa upang mas marami pang mamamayan ang mapalahok, mas epektibong makamit ang mga layunin nito at mas matitinding dagok ang maidulot sa kaaway. Walang kapaguran nating palaganapin ang rebolusyonaryong propaganda sa iba't ibang paraan at daluyan para maabot, mapukaw at mapakilos ang pinakamaraming mamamayan at makabig sila sa panig ng rebolusyon.

Tuluy-tuloy nating itaas ang antas ng militansya ng mga kilusan at pakikibakang masa hanggang sa humantong ito sa mga pag-aalsang bayan sa iba't ibang lugar sa kapuluan at mayanig ang reaksiyunaryong paghahari.

Samantala, ang tindi ng pandaigdigang krisis ng kapitalismo ay

magpapaalab sa iba pang mga proletaryo, demokratiko at anti-imperyalistang rebolusyon at mga kilusang masa sa iba't ibang bansa, laluna sa Ikatlong Daigdig. Inaasahan natin ang higit na pagtutulungan ng mga proletaryong rebolusyonaryo at iba pang progresibo, anti-imperyalista at maka-mamamayang kilusan at pwersa sa daigdig. Magdudulot ng inspirasyon at lakas ang tulongang ito sa mga rebolusyonaryong kilusan sa iba't ibang panig ng daigdig.

Ang pagsulong ng marami pang rebolusyonaryong pakikibaka sa daigdig at paglaganap ng pandaigdigang suporta sa digmang bayan sa Pilipinas ay magsisilbi ring malawak na kalasag sa tumitinding panghihimasok ng imperyalismong US sa rebolusyonaryong gera sa Pilipinas at pagsuhay sa naghihinalong papet na reaksiyunaryong estado.

Habang patuloy na nakapaghahari ang kinamumuhang rehimen ng US-Arroyo, mananatili itong pangunahing target ng paglaban sa buong bansa.

May humalili man kay Arroyo na ibang punong papet, hindi tatantan ng rebolusyonaryong kilusan ang paglaban sa kabuuan ng reaksiyunaryong papet na estado at sistema hangga't hindi ito tuluyang naibabagsak at napapalitan ng bagong demokratikong estado at sistema na may sosyalistang perspektiba.

Depende sa kaseryosohan ng papalit na rehimen sa prosesong pangkapayapaan, maaaring maresolbahan ang ilan o kalakhan ng sustantibong adhikain ng rebolusyon at mamamayan. Makatutulong ang muling pagbubukas at pagsulong ng usapang pangkapayapaan sa pagkakamit ng mga rebolusyonaryong layunin at sa pagpapagisi sa mga yugto at kabuuang proseso ng matagalang digmang bayan.

AB

# Anibersaryo ng PKP, matagumpay na naipagdiwang sa Mindanao

**M**atagumpay na naidaos ang pangunahing pagdiriwang sa Mindanao ng ika-41 anibersaryo ng Partido sa pamumuno ni Jorge "Ka Oris" Madlos sa kabila ng lantarang mga paglabag ng AFP sa sarili nitong deklarasyon ng tigil-putukan na umiral umano noong Disyembre 24-26. Umabot sa 3,000 katao ang dumalo sa makulay na selebrasyon. Kabilang dito ang mga mamamayan mula sa ibang prubinsya, bayan at baryo, 39 na kagawad ng midya at mga lokal na pulitiko.

Nanawagan si Ka Oris ng lubus-lubusang pagtupad ng mga tungkulin ng lahat ng rebolusyonaryong pwersa sa susunod na limang taon para maabot ang estratehikong pagkapatas mula sa estratehikong dependisiba.

Ipinanawagan niya ang pagpa-paigting ng armadong pakikibaka. Aniya, 90% ng mahigit 300 malalakas na armas na nadagdag sa arsenal ng BHB sa Mindanao noong 2009 ay nagmula sa mga taktikal na opensiba laban sa mga militar at pulis. Ilan daang libong magsasaka rin ang nabiyayaan sa pagsusulong ng rebolusyong agraryo sa buong isla ng Mindanao. Nakapagpalawak din sila ng eryang kinikilusan sa Northeastern Mindanao Region (NEMR) at iba pang bahagi ng isla.

Tampok din sa pagdiriwang ang pagpupugay sa mga kagawad ng midya na pinaslang sa Ampatuan, Maguindanao noong Nobyembre 23. Matapos basahin ang pahayag ng pagpupugay, paisha-isang binanggit ni Ka Oris ang mga pangalan ng 31 kagawad ng midya na biktima ng masaker sa Maguindanao. Pinangunahan naman ni Ka Maria Malaya, tagapagsalita ng NDF-NEMR at mga panauhing mamamahayag ang pagsindi ng mga kandila para sa mga namartir na tagamidya.

**Mga paglabag ng AFP sa tigil-putukan.** Samantala, iniulat ni Ka Oris ang pagtatangka ng AFP na bulabugin ang pangunahing sele-


brasyon ng NDF-Mindanao. Nagtayo ang mga elemento ng 58th IB at 41st DRC ng mga tsekpoynt sa Barangay Ganayon at Diatagon sa Lianga, Barangay Poblacion at Buhisan sa San Agustin at Barangay Amontay sa Marihatag noong Disyembre 25 para iharas ang mga mamamayan, alyado at kaibigang nais dumalo sa pagdiriwang. Tinakot ang ilang drayber ng motorsiklo para makunan ng impormasyon hinggil sa aktwal na lugar na pagdarausan ng selebrasyon.

Isang araw matapos ang pagdiriwang, isang kumpanya mula sa mga nabanggit na yunit-militar kasabay ang dalawang *armored personnel carrier*, isang tangke, isang *military jeep* at isang *military pickup* ang pumasok sa pinagdausan ng pagdiriwang sa may Barangay Mahaba, Marihatag pero may ayos nang nakaalis ang mga gerilya matapos makalabas ang mga imbitadong kagawad ng midya at iba pang bisita. Masusing sinubaybayan ng BHB ang kilos ng kaaway. May mahigpit na tagubilin sa mga gerilya na huwag paputukan ang mga yunit-militar bilang paggalang sa pagdiriwang ng mga lokal na residente sa bagong taon.

Samantala, pinigil sa mga tsekpoynt at nirekisa ang mga sasakyang nagmula sa Marihatag at kinunan ng bidyo ang mga pasahero. Matapang naman itong hinarap ng midya at iba pang mamamayan. Kinunan din ng bidyo ng midya ang

gayong harasment at ipinalabas ito sa telebisyon.

Noon ding Disyembre 25, nagtayo ng *tactical command post* ang 58th IB malapit sa lugar na pagdarausan ng selebrasyon sa Front 30 sa may Tago River, San Manuel, Surigao del Sur. Kinabukasan, pumosisyon na ang mga pwersang militar bilang paghahanda sa pagatake. Nagpasya ang komiteng nangangasiwa sa pagdiriwang na huwag nang ituloy ang ibang bahagi ng programa at ilipat ang mga pwersang gerilya at mamamayan para makaiwas sa labanan. Pero dahil sa patuloy na pagsulong ng AFP, nagsagupaan noong umaga ng Disyembre 27 ang isang yunit ng AFP at isang yunit ng BHB, na ikinasugat ng ilang sundalo. Gumanti ang AFP sa pamamagitan ng pagpapaputok ng 105 mm *howitzer*, subalit hindi nito tinamaan ang target. Kinabukasan, dalawang helikopter ang ipinadala ng kaaway para kunin ang mga kaswalting sundalo. **AB**



# Progresibong lider-masa sa Davao City, sumukob sa BHB

**P**ormal nang ipinahayag ng isang dating progresibong lider-masa sa Davao City na siya ay sumukob sa Bagong Hukbong Bayan (BHB) at kasalukuyang nasa pangangalaga nito.

Ayon kay Alvin Luque, dating pangkalahatang kalihim ng Bagong Alyansang Makabayan (BAYAN), "Ito ang pinakamakawatirang desisyon para sa akin dahil ang mga organisasyong ito ang makapagbibigay-garantiya di lamang sa kaligtasan ko sa pampulitikang pamamaslang kundi, higit sa lahat, sa kalayaan ng mamamayan sa mahigpit na pang-aapi ng reaksyunaryong pasistang estado."

"Humihinga pa rin ako at lumalaban dahil sa desisyon kong ito," ani Luque. Mula pa noong 2002, si Luque ay isinama na ng Armed Forces of the Philippines (AFP) sa order of battle nito at naging target ng matinding panggigipit ng militar. Sinampahan siya ng mga gawagawang kasong arson at rebelyon at tinangkang arestuhin noong 2007.

Lumantad si Luque noong Disyembre 26 sa pagdiriwang ng anibersaryo ng PKP sa Marihatag, Surigao del Sur, sa pangunguna ng National Democratic Front. Ayon kay Luque, nagpasya siyang isiwalat sa publiko ang kanyang katayuan para matahimik na ang iba't ibang ispekulasyon at kasinungalingang inilalako ng AFP mula nang mawala siya sa ligal na demokrati-kong kilusan noong 2007.

Ipinaliwanag ni Luque na nagpasya siyang sumukob sa BHB dahil kung hinayaan niyang arestuhin siya, magiging bulnerable siya sa iba't ibang uri ng atake, lalupa't binansagan siya ng AFP na "kaaway ng estado." Iginiit ni Luque na inosente siya sa mga kasong kriminal na isinampa sa kanya ng AFP sa isang korte sa Davao City. "Nais ko

sanang humarap sa pagdinig at ihayag ang aking panig, subalit iyon ay imposibleng gawin sa ilalim ng rehimeng ito na walang pakundangan."

Tinukoy niya na sa ilalim ng rehimeng US-Arroyo, mahigit isanlibo nang kritiko nito ang naging biktima ng ekstrahudisyal na pamamaslang, kabilang ang mga mamamahayag, abugado at taong simbahan. "Hindi ako pwedeng magsa-



walang-kibo na lamang sa sunud-sunod na pamamaslang at magkunwaring mainam ang kalagayan. Kailangang gumawa ng makatarungang aksyon. Kaya tungkulin kong gawin ang lahat ng aking makakaya di lamang para mabuhay kundi patuloy na mabuhay nang lumalaban para sa mamamayang walang patid na pinagsasamantalahan at inaapi ng rehimen."

AB

## AFP, bigo sa Samar

**S**a kabila ng pagkukumahog ni Gen. Arthur Tabaquero, hepe ng 8th ID ng Philippine Army, nabigo pa rin itong durugin ang rebolusyonaryong armadong pakikibaka sa rehiyon. Mula Enero hanggang Nobyembre 2009, matagumpay na nakapaglunsad ang BHB ng 60 mga taktikal na opensiba kung saan nakasamsam sila ng 37 armas at nakapatay ng 90 elemento ng kaaway.

Partikular sa probinsya ng Samar, magiting na binigo ng BHB at ng mamamayan ang labimpitong (17) malalaking opensibang militar ng 8th ID na kinabibilangan ng 14 na laking batalyon, dalawang laking brigada at isang laking dibisyong operasyon.

Sa harap ng mababangis na pananalakay, walang nawasak na yunit ng BHB sa nasabing probinsya. Bagkus, nakapaglunsad ng mga kontra-opensiba ang mga yunit ng BHB, ani Ka Vicente Magbuhat, tagapagsalita ng Arnulfo Ortiz Command ng BHB sa probinsya ng Samar.

Mula Enero hanggang Nobyembre 2009, nakapaglunsad ang BHB rito ng 32 taktikal na opensiba, nakaagaw ng 18 malalakas na armas at mga bala, nakapatay ng 21 sundalo at nakasugat ng sampu. Bunsod ng pakikihamok nila sa mga reaksyunaryong pasistang tropa, napataas ng mga Pulang mandirigma ang kanilang kakayahang lumaban.

Wala ring larangang gerilya sa Samar na napakitid ng kaaway dahil lamang sa desperadong paghahasik nito ng pasistang lagim. Sa katunayan, nakapagbukas pa ang BHB ng dagdag na eryang makikilusan.

Dahil sa patuloy na paglakas ng rebolusyonaryong pwersa sa Eastern Visayas, napilitang aminin ni General Tabaquero na hindi nila kayang durugin ang BHB sa itinakda nilang dedlayn.

AB



## Ambus sa Cagayan Valley

**A**yon sa pinakahuling ulat-koresponsal mula sa Cagayan Valley, sampung elemento ng 17th IB ang napatay sa sunud-sunod na mga pang-aatake ng mga Pulang mandirigma sa ilalim ng Henry Abraham Command-BHB sa East Cagayan.


Noong Oktubre 28, apat na tropa ng pinaliit na platun ng 17th IB ang napatay nang tambangan sila habang nagpapatrulya sa Barangay Sta. Clara, bayan ng Sta. Ana.

Noong Oktubre 30, anim ang kumpirmadong napatay sa 15-minutong labanan sa pagitan ng BHB at isang platun ng kaaway sa Barangay Kapanikian, bayan ng Sta. Ana. Mga limang metro lamang ang layo ng kaaway bago sila paputukan ng mga Pulang mandirigma. Nasamsam ng BHB ang isang M16 at sampung magasin na puno ng mga bala.

Kumaripas ng takbo ang mga kaaway nang matambangan sila. Sa gubat na namatay ang mga sundalong tinamaan ng bala.

Nagsimula ang matinding operasyong militar ng kaaway noong Oktubre 12 nang magpakawala ang

17th IB ng Reengineered Special Operations Team (RSOT) sa mga barangay ng Sta. Clara, Kapanikian at Dungeg para maghasik ng teroristang lagim laban sa mamamayang tumututol sa pangangamkam ng lupa ng Cagayan Export Zone Authority ng dinastiyang Enrile. **AB**



## Mga tagumpay sa Panay

**I**niulat ni Concha Araneta, tagapagsalita ng Panay Regional Party Committee, na noong nagdaang taon ay nakapaglunsad ng 13 mga taktikal na opensiba ang BHB. Nakapagdulot ito ng 21 kaswalti sa kaaway na kinabilangan ng walong patay at 13 sugatan. Ang mga ito, ayon kay Araneta, ay bahagi lamang ng naanang mga tagumpay ng Partido sa buong isla. Bukod sa armadong pakikibaka, tuluy-tuloy din ang paglarga ng mga kilos protesta sa kanayunan at mga sentrong urban ng isla laban sa tiwaling rehimen.

Ayon kay Araneta, sa kabila ng pinaigting na mga opensibang militar sa ilalim ng OBL, ang mga rebolusyonaryong pwersa ay lalo pang lumakas. Sa darating na mga buwan ay makukumpleto na ang dalawa hanggang tatlong laking kumpanyang larangang gerilya. Kaugnay nito, tiwala silang mabibigo nila ang kontra-rebolusyonaryong kampanya ng kaaway. **AB**

## Tropa ng 16th IB, tinambangan

**H**indi bababa sa tatlong sundalo ng 16th IB ang nasugatan nang salakayin ng mga kasapi ng Mario Corpuz Command ng BHB ang detachment ng Alpha Company ng 16th IB sa Sityo Taiwanese, Barangay Magsaysay, Infanta, Quezon noong Enero 4. Nakasamsam ang BHB ng mga riple, pistola, mga bala at mga gamit pang-komunikasyon. Naiwan ang mga ito nang magsitakbuhan ang isang iskward ng militar na pinamumunuan ni Lieutenant Marcos. Walang anumang kaswalti sa panig ng BHB.

Samantala, iniulat ng Apolinario Mendoza Command (AMC) ng BHB na kumikilos sa bahagi ng Bondoc Peninsula na labingwalong (18) armas ang kanilang nasamsam sa pagsalakay nila sa istasyon ng pulis ng San Narciso, Quezon noong Disyembre 20.

Pinabulaanan ng AMC na sila ang may kagagawan ng panununog sa walong kwarto ng eskwelahan sa bayan ng Catanauan noong Disyembre 26. Anito, pinakamalalang na ang panununog ay bahagi ng operasyong saywar ng AFP dahil sadyang pinagmukha ng mga salarin na ginawa ito ng BHB.

Sa prubinsya ng Rizal, inatasan na ng Narciso Antazo Aramil Command ang mga yunit nito na maglunsad ng mga taktikal na opensiba laban sa kaaway alinsunod sa panawagan ng Partido. Bago pa ito, matagumpay itong nakapagsagawa ng taktikal na opensiba noong Disyembre 7 at 9, bagay na lalong ikinagalit ng 16th IB na pinamumunuan ni Lt. Col. Marc Ernest Rosal. **AB**

# Ilampung libong magsasaka sa Caraga, nakikinabang sa rebolusyong agraryo

**M**ahigit 30,000 magsasaka na ang nakikinabang sa koordinadong kampanya sa rebolusyong agraryo na inilunsad ng rebolusyonaryong kilusan sa iba't ibang baryo at bayan sa rehiyon ng Caraga (Northeastern Mindanao) nitong 2009. Ito ang panimulang ulat na nakalap ng *Ang Bayan* sa pakikipanayam sa mga namumunong kadre ng Partido sa rehiyon.

Nagsimula ang kampanya noong Abril at nagtapos ito noong Disyembre.

Sa loob ng anim na buwan, halos lahat ng mga larangang gerilya ay nakapaglunsad ng mahigit 30 antipyudal na mga aksyong masa. Nailunsad ang mga antas-baryong aksyong masa sa 23 barangay. Tumutok ito sa pagpapataas ng sahod ng mga manggagawang bukid at pagpapababa ng interes sa pautang at ng upa sa kagamitan sa produksyon. Nakapaglunsad din ng pitong inter-baryong kampanya na pangunahing nakatuon sa pagpapataas ng presyo ng saging at niyog. Umabot sa 36 na baryo at 380 pamilya ang direktang lumahok sa nasabing kampanya.

Nakinabang dito ang 6,780 pamilya o mahigit 33,900 katao mula sa walong baryo.

Lubos na ikinatuwa ng masang magsasaka ang pagkakamit nila ng mga pakinabang. Noo'y napakalaking tapyas sa kita ng mga magni-niyog ang pagbabawas sa kwenta ng "bungkig" o anumang butal sa eksaktong tatlo, apat o limang kilong timbang kada sako. Naigiit ng mga magsasaka na isama na sa kwenta ang "bungkig."

Naigiit din nila ang ₱150-200 bawat araw na sahod sa mga nagtatrabaho sa niyugan, bukod sa libreng tanghalian at meryenda. Dati, ang sahod ay ₱100-120 at hindi libre ang pagkain. Ang *hand tractor* na dating inuupahan nang ₱150 bawat oras ay ₱120 bawat oras na lamang ang bayad. Ang kabayaran

sa bawat ₱1,000 utang na lima hanggang pitong sakong palay ay naibaba sa tatlong sakong palay na lamang.

Nakamit ng mga magsasaka at manggagawang bukid ang kanilang mga iginigiit sa pamamagitan ng pakipagnegosasyon sa mga panginoong maylupa at komersyante-usurero. Sa negosasyon, malinaw na inilahad ng mga magsasaka ang kanilang mga pag-aaral na nagpapakita ng sobra-sobrang kita ng mga panginoong maylupa at komersyante-usurero at pagkaagrabyado naman



ng mga magsasaka. Walang nagawa ang mga panginoong maylupa at komersyante sa harap ng makatarungang hiling ng masang magsasaka at sa epektibo nilang mga paraan sa pakikipagnegosasyon.

Ang nabanggit na mga tagumpay ay dagdag sa mga nauna nang tagumpay na nakamit sa sustenidong paglulunsad ng rebolusyong agraryo sa Caraga. Sa ngayon, halos 20% ng kabuuang bilang ng mga baryong nakikilusan sa rehiyon ang nasasaklaw ng mga antipyudal na kampanya. Tuluy-tuloy na pinalalawak ang saklaw ng rebolusyong agraryo sa rehiyon bilang matatag na salalayan ng pagsusulong ng armadong pakikibaka at pagpapalawak at pagkokonsolida sa baseng masa. **AB**

## Lider-Lumad, pinaslang

**I**nambus ng mga armadong lalaki noong Disyembre 24 si Alberto "Berting" Pinagawa, 54 anyos, habang naglalakad pauwi sa kaniyang barangay. Nangyari ang krimen sa Barangay Eureka, Gingoog City, Misamis Oriental. Nagtamo si Pinagawa ng 20 tama ng bala ng M16 na siyang ikinamatay niya.

Bago siya paslangin ay aktibong kumikilos si Pinagawa laban sa pagtotroso ng Southwood Timber Corporation na may 11,476 ektaryang konsesyong sumasaklaw hanggang sa lupaing ninuno ng mga Higaonon. Saklaw din ng 25-taong konsesyon ang mga kritikal na *watershed area* sa lugar.

Sa kabila ng maraming pagbabanta sa kanyang buhay, nagpatuloy si Pinagawa sa pangangampanya laban sa mga kumpanya ng pagtotroso para maitigil na ang pagkalbo ng kagubatan, lalung-lalo na sa lupaing ninuno ng mga Higaonon.

Matapos siya paslangin ay inendorso ng Sangguniang Panglungsod ng Gingoog City ang resolusyon na isusumite nito sa DENR para pawalambisa na ang Integrated Forest Management Agreement (IFMA) na iginawad ng DENR sa Southwood Timber.

Si Pinagawa ang ika-140 nang Lumad na nagtatanggol sa lupaing ninuno na pinaslang sa Northern Mindanao mula noong 2001. **AB**

# Wakasan ang monopolyong kapitalismo para pigilin ang pagbabago ng klima

*Ang sumusunod ay mga sipi mula sa pahayag ni Prof. Jose Maria Si-son, tagapangulo ng International League of Peoples' Struggle hinggil sa kritisismo niya sa Climate Change Summit na ginanap noong Disyembre 7-18 sa Copenhagen, Denmark. Ang pagtitipon ay dinaluhan ng mga kinatawan ng halos lahat ng bansa sa mundo para harapin ang problema ng pag-init ng temperatura ng mundo. Pero puro hungkag na pangako ang kinalabasan ng kumperensya dahil sa dominasyon at pananabotahe ng mga imperyalistang bansa, pangunahin na ang US.*

**A**ng walang kaparis na pagtaas ng ibinubugang mga *greenhouse gas* (GHG)\* na nagdudulot ng pagtaas ng temperatura ng mundo ay kasabay ng pagpasok ng sistemang kapitalista noong rebolusyong pang-industriya at ng kaakibat nitong paggamit ng mga makina at mga panggatong tulad ng mga produktong petrolyo at uling na karbon para sa transportasyon at enerhiya. Bunsod ng walang renda, maaksaya at maruming produksyong kapitalista para lumikha ng tubo, nalagay ang daigdig sa bingit ng pagkawasak. Sa ilalim ng sistema kung saan tubo ang pangunahing layunin ng produksyon ng lipunan, ang kapaligiran at kalikasan ay pinagkukunan na lamang ng hilaw na materyales at tambakan ng mga mahilig mag-aksaya.

Doble-dobleng dusa ang dulot ng pandarambong at polusyon sa mga pamayanang maralita. Ito rin ang mga pamayanang pinakahan-tad sa mga ganti ng kalikasan, na dumarating sa anyo ng mga baha, tagtuyot at iba pang sakunang dulot o pinatitindi ng umiiral na kawalan ng balanse sa kalikasan. Ang kababaihan at mga bata ang dumaranas ng mas matinding tama ng mga kalagayang ito dahil sa mas malaking peligro sa kanilang kalusugan, at mga dagdag na komplikasyon sa kanilang papel sa produksyon at reproduksyon.

Papabilis na lumalaganap ang sistematiko at walang lubay na pagsira sa kagubatan sa pamamagitan ng industriyal na pagtotroso. Ang pagkasira ng kagubatan ng

mundo ay humantong din sa kumbersyon ng mga tanimang agrikultural para sa mga pang-eksport na pananim, pastulan ng baka o taniman ng iisang klaseng punongkahoy. Tuluy-tuloy ang walang patawad na paghuhukay ng mga mineral at walang habas na pananalasa ng mga multinasyunal na korporasyon sa pagmimina sa Asia-Pacific, Latin America at Africa na likas na sagana sa mga depositong mineral. Nagbubunsod ito ng malawakang pagkasira at pagdumi ng kapaligiran, laganap na kawalan ng lupa at dislokasyon, pagkawala ng kabu-hayan, pagkasira ng lokal na kultura at laganap na mga paglabag sa karapatang-tao sa mga rehiyong ito.

Ang pinakahuling mga gerang agresyon ng US at mga kaalyado



nito ay hindi lamang nagpalaki sa produksyon, bentahan at paggamit ng mga sandatang panlipol kundi nagbunsod pa ng malawakang pagkasira at pagdumi ng mga ari-arian, kalusugan at kapaligiran sa Balkans, Afghanistan, Iraq at iba pang bansang sinalanta ng gera. Ang paghawan sa mga gubat at kumbersyon ng mga lupain na sadyang para sa patuloy na mga pagsasanay-militar sa iba't ibang bahagi ng mundo sa pangunguna ng US ay nagpaparumi sa kapaligiran at sumisira sa mga likas na panirahan. Patuloy na pumipinsala sa kalikasan ang mga nakalalasong basura ng kasalukuyan at dating mga base militar ng US. Hindi lamang tuwirang agresyong militar ng US ang dala ng mga pagsasanay-militar ng US kundi pati mapanganib na mga sandata at basura mula sa naturang mga aktibidad.

Ang US ang numero unong tagalikha ng mga GHG ngayon. Sa US nagmumula ang 28% ng lahat ng GHG na ibinubuga sa buong mundo mula noong 1840. Humigit-kumulang 84% ng GHG na ibinubuga ng US ay nagmumula sa sektor ng enerhiya at kuryenteng pinatatakbo ng petrolyo. Ang US din ang pinakamalaking tagaproseso at walang rendang gumagamit ng langis at mga produktong petrolyo sa buong mundo.

Pero ayaw ng gubyernong US na

*\*Ang mga greenhouse gas (GHG) ay nagpapakapal sa atmospera at dahil dito ay nakukulong sa mundo ang init mula sa araw kaya umiinit ang pandaigdigang klima.*



pagtibayin ang Kyoto Protocol, internasyunal na kasunduang pirma-  
do ng 169 na bansa na naglalayong  
ibaba nang 5.2% ang pandaigdi-  
gang antas ng ibinubugang *carbon  
dioxide* at limang iba pang GHG  
mula sa antas noong 1990. Ang US  
din ang patuloy na nagmamatigas  
sa matagalan at mabilis na pagba-  
bawas ng ibinubugang GHG sa nag-  
papatuloy na negosasyon para sa  
mga bagong kasunduan sa ilalim ng  
United Nations Framework Conven-  
tion on Climate Change (UNFCCC)  
sa Copenhagen.

Pinasasahol na ng pagbabago  
ng klima ang iba pang problema sa  
kapaligiran na hinaharap ng mga  
maralitang pamayanan bunsod ng  
papalalang pagsira ng imperyalis-  
tang globalisasyon sa ating kalika-  
san. Hindi na ito usapin kung ka-  
gagawan ng tao ang mapanganib  
na pagbabago ng klima kundi kung  
paano maiiwasan ang mapanala-  
sang epekto nito na makaaapekto  
sa mahigit kalahati ng populasyon  
ng mundo na pinakabulnerable ri-  
to. Dapat umako ng responsibilidad  
ang mga industriyalisadong bansa  
sa pagkakamit ng mga tunay na  
target at huwag ipasa ang obliga-  
syon sa mga atrasadong bansa. Da-  
pat palakasin ang kakayahan ng  
mga lokal na komunidad na tumu-  
gon sa mga kalamidad. Dapat isa-  
gawa sa antas ng mga komunidad  
ang mga programa para mahusay  
na makatugon sa mga sakuna, ma-  
monitor ang mga ito at maibsan  
ang mga pinsalang dulot nito. Da-  
pat ding bigyan ng ikabubuhay ang  
mga bulnerable sa epekto ng pag-  
babago ng klima.

Malalaking pagsulong na ang  
narating sa teknolohiya ngunit  
hindi naman ginagamit ang mga  
ito para lutasin ang mga saligang  
problema ng sangkatauhan tulad  
ng pagbagsak ng mga sistemang  
pangkalusugan, kagutuman, pagka-  
sira ng kalikasan at pagsahol at  
disintegrasyon ng lipunan. Bagkus,

binuksan ng walang rendang kapi-  
talistang globalisasyon ang mga  
rekurso ng Ikatlong Daigdig para sa  
kapakinabangan ng mga korpora-  
syong transnasyunal na kumukuha  
ng hilaw na materyales habang  
nag-iiwan ng kanilang basura sa  
mga komunidad kung saan sila  
nag-ooperasyon.

Dapat nating ibaling ang direk-  
syon ng produksyon at konsumo  
batay sa mga pangangailangan ng  
tao imbes na sa walang katapusang  
akumulasyon ng tubo para sa iilan.  
Dapat kolektibong kontrolin ng li-  
punan ang mga produktibong re-  
kurso para matugunan ang mga pa-  
ngangailangan ng sustenableng  
kaunlarang panlipunan at maiwa-

san ang sobrang produksyon, sob-  
rang konsumo at sobrang pagsasa-  
mantala sa mga tao at sa kapaligi-  
ran na hindi maiiwasan sa umiiral  
na sistema ng monopolyong kapi-  
talismo.

Para masawata ang pagbabago  
ng klima, dapat nating wakasan  
ang sistematikong pandarambong  
sa kapaligiran para sa sobrang tubo  
ng mga korporasyon sa mga indus-  
triyalisadong bansa. Dapat nating  
organisahin at ipagtanggol ang  
ating kinabukasan laban sa pala-  
munin at naghihingalong sistema.  
Dapat nating wakasan ang domina-  
syon ng monopolyong kapital sa  
ating buhay at itayo ang sosyalis-  
tang hinaharap. **AB**

## Raling iglap, inilunsad ng MSP

**N**aglunsad ng raling iglap noong Nobyembre 26 ang Makabayang  
Samahang Pangkalusugan (MSP) sa Maynila kaugnay ng pagdi-  
riwang ng ika-31 anibersaryo ng pagkakatatag ng kanilang organi-  
sasyon.

Sa kanilang pahayag, nanawagan ang mga kasapi ng MSP sa la-  
hat ng mga doktor, nars at kawaning pangkalusugan na sumapi sa  
Bagong Hukbong Bayan (BHB) at lumahok sa digmang bayan sa ka-  
nayunan.

Sa kalunsuran, aktibong tumutugon ang MSP sa panawagan ng  
Partido Komunista ng Pilipinas at National Democratic Front of the  
Philippines (NDFP) na makipagtulungan at kumilos kasama ng ma-  
mamayan na makaahon sa kalamidad. Nakapaglunsad ito ng masig-  
lang *relief operations*, misyong medikal at *stress debriefing* sa mga  
maralitang komunidad na nasalanta ng kalamidad. Kumilos ang MSP  
para singilin ang rehimeng Arroyo sa kriminal na kapabayaang nito  
sa mga biktima ng kalamidad at responsibilidad nito sa malawak na  
sakunang dinaranas ng mamamayan.

Sa kanayunan, masigasig na nakikipaglungan ang MSP sa mga  
larangang gerilya sa paglulunsad ng mga pagsasanay medikal sa  
hanay ng mga medik ng BHB at mga komite sa kalusugan ng mga  
rebolusyonaryong organisasyong masa sa mga baryo para matugu-  
nan ang mga pangangailangang pangkalusugan sa halip na umasa  
sa bulok na programang pangkalusugan ng rehimeng Arroyo.

Samantala, naglunsad ng operasyong pinta (OP) ang mga kasa-  
pi ng Artista at Manunulat ng Sambayanan (ARMAS) sa ilang baha-  
gi ng Quezon City bilang paggunita sa ika-41 anibersaryo ng Parti-  
do.

Ang MSP at ARMAS ay kabilang sa magkakaalyadong organisa-  
syon ng NDFP. **AB**



# Hamon sa dominasyon ng dolyar sa Latin America

**D**isyembre 14 nang ianunsyo ng mga kinatawan ng Bolivarian Alliance for the Peoples of Our America (mas kilala sa katawagang Alianza Bolivariana para los Pueblos de Nuestra América, o ALBA) ang pagkakaroon ng komun na salapi sa hanay ng mga kasaping bansa nito. Pinangalanang *sucre* (Sistema Único de Compensación Regional o Unified System for Regional Compensation) ang bagong komun na salapi ng mga myembro ng ALBA. Simula ngayong Enero 2010, hahalili na ang *sucre* sa dolyar bilang pangunahing salaping gagamitin sa palitan ng kalakal at serbisyo sa hanay ng mga myembrong bansa ng ALBA.

Magtatayo ang ALBA ng isang sentral na bangko nitong nakabase sa Venezuela at mga sangay nito sa mga myembrong bansa. Idaraan ang mga transaksyong pangkalakalan at pampinansya sa hanay ng mga myembro ng ALBA sa pagitan ng mga bangkong ito.

Hindi pa kagyat na gagamitin ang *sucre* bilang panloob na salapi sa mga lokal na ekonomya. Gagamitin na muna ito sa panlabas na kalakalan, at sa simula ay daraan pa ang mga transaksyon sa mga bangkong ALBA. Dati nang nagkalakalan ang mga bansang ALBA na di gumagamit ng dolyar bilang salapi, kundi sa pamamagitan na ng tuwirang palitan ng mga produkto at serbisyo. Ngayo'y magagamit na nilang instrumento ang *sucre* para mas mapadulas at mapaunlad pa ang kalakalan sa hanay nila. Halimbawa, kung bibili ang Venezuela ng mga damit mula sa Bolivia, maaari itong bayaran ng Venezuela ng langis o anumang produkto o serbisyong kinakailangan ng Bolivia. Kung may sukli o diperensya sa halaga ng palitan, babayaran ito sa anyo ng salaping *sucre* na idaraan sa mga bangkong ALBA. Ipapasa ang sukli sa pagitan ng sentral na bangko at lokal na bangkong ALBA sa elektronikong pamamaraan. Awtomatikong mababaling sa lokal na salapi ang ha-

laga ng sukling ibabayad sa kinaukulang lokal na empresa o guberno.

May planong gamitin na rin sa mga susunod na taon ang *sucre* maging sa mga panloob na transaksyon ng mga myembro ng ALBA, tulad ng paggamit ng *euro* sa loob ng mga bansang myembro ng European Union at sa paggamit ng *ruble* sa mga bansa sa blokeng Soviet noon.

Ang pagkakalunsad ng *sucre* ay patunay ng determinasyon ng ALBA at mga myembrong bansa nito na labanan ang imperyalismo. Nakikita ng mga lider ng mga bansang ALBA ang kahalagahan ng *sucre* hindi lamang sa kasarinlan at pro-

teksyon ng kalakalan sa kanilang hanay, kundi bilang panangga sa tuluy-tuloy na pagbaba ng halaga ng dolyar. Proteksyon din ito laban sa anumang maniobra ng US sa dolyar nito sa harap ng matinding krisis sa ekonomya ngayon sa US at sa buong daigdig na nadodominahan ng dolyar.

Naniniwala rin ang mga bansang myembro ng ALBA na magbigay-daan din ang *sucre* sa pag-unlad ng kani-kanilang mga ekonomya kahit sa di tuwirang paraan. Halimbawa, maaari silang magkaisa sa pagtatakda ng magkakaparehong buwis sa mga inaangkat na produkto mula sa iba pang bansa, na ibabatay sa salaping *sucre*, para maengganyo at mapangalagaan ang mga umuusbong na industriya sa kani-kanilang mga bansa. At dahil malawak-lawak din ang saklaw ng ALBA, ang pagkakaroon nila ng komun na salapi ay maaaring magbunsod ng dibersipikasyon, kumplementasyon at kabuuang pag-unlad ng mga industriya sa loob ng rehiyon sa halip na magkani-kanya sila sa iilang produksyong industrial at mag-angkat na lamang ng mas marami pang mga produkto mula sa mga imperyalista at iba



Pres. Raul Castro ng Cuba (kaliwa) at Pres. Hugo Chavez ng Venezuela



pang bansa (tulad halimbawa ng mga sasakyan na pawang iniimport pa mula sa US, pero maaari namang pagtulungan nang proyektuhin ng ALBA.)

Ang dolyar pa rin ang gagamiting salapi sa pakikipagkalakalan ng mga bansang ALBA labas sa saklaw ng kasunduan. Sa partikular, nananatiling nakabatay sa halaga ng dolyar sa pandaigdigang pamilihan ang pagpepresyo ng Venezuela sa iniluluwas nitong langis patungong US.

Gayunman, maaaring magsilbing karagdagang udyok ang pagkakalunsad ng *sucre* sa pagkakaroon ng bagong mas istableng salaping pangkalakalan sa buong

mundo na papalit sa naghihinalang dolyar. Malaon na itong itinutulak ng China, Iran at marami pang bansa, bukod pa sa mga bansang myembro ng ALBA.

Sa ngayon, nakaasa pa sa kasalukuyang mga nakaupong lider ng mga bansang ALBA ang paggamit ng *sucre* at ang paglahok ng mga bansa nila sa rehiyunal na alyansang pangkalakalan. Ang kahinaang ito ay tumatampok sa namumuong pag-atras ng Honduras sa ALBA kung hindi makababalik ang maka-kaliwang presidente nito na napatalsik noong kalagitnaan ng 2009 sa pamamagitan ng isang kudatang inudyok at pinondohan ng US. **AB**

## Kasaysayan ng ALBA

**A**ng pagtatayo ng ALBA ay pinangunahan ni Pres. Hugo Chavez ng Venezuela noong 2004 bilang alternatibo sa Free Trade Area of the Americas (FTAA) na itinutulak ng imperyalismong US para magsilbing sentro ng kalakalan sa rehiyon sa ilalim ng dominasyon ng US. Kabilang sa mga myembro ng ALBA ang nakararaming bansa sa Latin America: Venezuela, Cuba, Nicaragua, Ecuador, Bolivia, Antigua and Barbuda, Saint Vincent and the Grenadines, Dominica at Honduras. Nakaupo naman bilang mga “estadong tagamasid” ang Haiti, Iran at Uruguay.

Nagsimula ang ALBA bilang isang kasunduan sa pagitan ng Venezuela at Cuba at di nagtagal ay lumahok din sa kasunduan ang siyam pang bansa sa Latin America. Ang kasunduang ito na nakabase sa integrasyon, kooperasyon at pagkakaisa ng mga bansang kasapi nito ay may katangiang anti-imperyalista at may layuning tiyakin ang proteksyon at pakinabang ng mga bansang kalahok dito.

Halimbawa, napaunlad nito ang kalakalan sa pagitan ng Venezuela at Cuba nang hindi na idinadaan sa palitan ng salapi at hindi na nakasalalay sa dolyar. Nag-eeksport ang Venezuela ng langis sa Cuba at binabayaran ito ng Cuba sa anyo ng suporta sa mga programang panlipunan at industriyal ng guberno ng Venezuela, tulad ng pagpapadala ng mga duktur, guro at mga eksperto sa teknolohiyang pang-industriya. Nag-eeksport din ang Venezuela ng langis sa Nicaragua at pinapalitan naman ito ng Nicaragua sa anyo ng mga produkto at teknolohiyang agrikultural.

Isang pag-unlad sa gayong sistema ng palitan ang paggamit ng komun na salaping pangkalakalan na hindi na nakatali sa dolyar at hindi na mapakikialaman ng mga imperyalista. **AB**

## Effigy ni Obama, sinunog sa Afghanistan

**S**inunog ng mga estudyante sa Afghanistan ang isang *effigy* ni Pres. Barack Obama ng US noong Disyembre 30 bilang protesta sa pagkamatay ng sampung sibilyan sa pinakahuling operasyong militar ng US Special Forces.

Nangyari ang operasyon sa prubinsya ng Kunar noong Disyembre 26. Siyam sa sampung sibilyang napatay ay mga estudyante. Natutulog ang mga biktima nang sila ay pagbabarilin ng mga sundalong Amerikano.

Daan-daang mga estudyante ng Nangahar University ang nagmartsa sa mga lansangan at nagsisigaw ng “kamatayan” para kay Obama at sa mga pwersang dayuhan. Naglagay sila ng mga harang sa mga pangunahing kalsada patungong Jalalabad, kabisera ng prubinsya ng Nangahar.

Nanawagan din ang mga estudyante na palayasin ang mga pwersa ng US at NATO at iginiit nilang magkaroon ng kasarinlan sa pulitika ang mamamayang Afghan. Nagbanta silang humawak ng armas sa halip na papel at bolpen kung magpapatuloy pa rin ang gerang agresyon.

Sinunog din nila ang bandila ng US bago maghiwa-hiwalay. Nakatakda pang maglunsad ng katu-lad na mga protesta ang mga kabataan sa Kabul, kabisera ng bansa.

Ang pagkamatay ng maraming sibilyan sa walong taong gerang agresyon ng US sa bansa ay lalong nagbubunsod ng matinding galit ng mamamayang Afghan sa papet na presidenteng si Hamid Karzai at sa mga dayuhang mananakop. **AB**

## PISTON, tutol sa proyektong RFID

NAGLUNSAD ng kilos-protesta nitong Enero 4 ang mga kasapi ng Pinagkaisang Samahan ng mga Tsuper at Operators Nationwide (PISTON) sa harap ng Land Transportation Office (LTO) sa Quezon City para tutulan ang pagkakabit ng Radio Frequency Information Device (RFID) sa mga sasakyan. Sa pamamagitan ng mga RFID, mababasa agad sa elektronikong paraan ang datos sa rehistrasyon ng sasakyan, modelo at kulay nito.

Sinabi ni George San Mateo, pangkalahatang kalihim ng PISTON, na iligal ang nasabing proyekto dahil walang *public bidding* na isinagawa. Aniya, hindi rin naman ito epektibo at pagkakakitaan lamang ng mga kurakot na upisyal ang nasabing proyekto. Umaabot sa P350.00 ang halaga ng RFID, at kung idadagdag pa ang P169.06 bayad sa pagpoproseso nito sa kompyuter, lumalabas na P519.06 ang kabuuang babayaran sa RFID. Sinabi pa ni San Mateo na dagdag-gastos lamang ito sa mga

motorista at maaring magbunga pa ito ng ilang paglabag sa karapatang-tao tulad ng karapatang pangalagaan ang pribadong impormasyon.

Sinabi naman ni Bayan Muna Rep. Teddy Casiño na ang aktwal na papel ng RFID ay lumikom ng pondo para sa darating na eleksyon. Aniya, umaabot lamang sa P10 ang totoong halaga ng bawat RFID batay sa mga pananaliksik, subalit ito ay lumobo sa P350.00. Mahigit P2.45 bilyon ang kikitain sa RFID.

Nagbigay-payo si Casiño sa mga motorista na huwag munang bumili ng RFID hangga't hindi pa nagdedesisyon ang Korte Suprema sa usapin ng RFID. Nagsampa ng petisyon para sa Temporary Restraining Order (TRO) ang PISTON at iba pang progresibong organisasyon para mapahinto ang implementasyon ng RFID.

Malawakang tigil-pasada naman ang ilulunsad ng PISTON kung magpapatuloy ang nasabing proyekto.

## Lumolobong utang ng bansa

UMAABOT na sa P47,039 ang utang ng bawat Pilipino ngayong 2010, mas mataas sa P45,889 noong nakaraang taon. Ibinatay ng mga ekonomista ang pagtayang ito sa kabuuang utang ng guberno noong nakaraang Setyembre na P4.3 trilyon. Ang Pilipinas ay may kabuuang populasyong 92 milyon.

Patuloy na lumalaki ang pangungutang ng guberno sa harap ng lumolobong depisit nito sa badyet. Nangangahulugan ito ng dagdag na pasanin hindi lamang ng kasalukuyan kundi ng susunod

pang henerasyon.

Noong Nobyembre 2009, ang depisit sa badyet ng guberno ay umaabot na sa P272.5 bilyon. Ngayong pagpasok ng 2010, aabot na ito sa halos P300 bilyon, ayon kay Finance Secretary Margarito Teves. Lagpas ito sa pagtaya ng Department of Finance na P250 bilyong depisit.

Tinatanaw na lalaki pa hanggang P4.7 trilyon ang utang ng guberno ngayong taon. Kapag nangyari iyon, magiging P50,000 na ang utang ng bawat Pilipino.

## Operasyon ng CIA sa Afghanistan, nabulabog

SUSPENDIDO ang operasyon ng isang mayor na *forward operating base* ng Central Intelligence Agency (CIA) ng US sa Afghanistan nang mapatay ang marami sa mga operatiba nito. Napatay ang pitong upisyal ng CIA matapos magpasabog ang isang *suicide bomber* sa loob ng base noong Disyembre 30. Anim na istap din ng naturang ahensya ang malubhang nasugatan.

Kinumpirma ng hepe ng CIA na si Leon Panetta na ang pito ay mga upisyal ng ahensyang paniktik ng US. Kabilang sa mga kaswal ti ang upisyal na namumuno ng kanilang operasyong paniktik sa Forward Operating Base Chapman sa prubinsya ng Khost, sa timog-silangang bahagi ng Afghanistan.

Ang Forward Operating Base Chapman ay mahigit 30 kilometro lamang ang layo sa hangganan ng Pakistan. Bunga ng insidente, nalandad sa midya ang papel ng naturang lihim na base bilang sentro ng pangangalap ng datos paniktik, pagtukoy ng mga target para sa pang-aatake ng mga eroplanong *drone* at pagpapalano ng mga misyon para patayin ang mga pinagsususpetsahang gerilyang Pakistani at Afghan. Sa hilagang-kanlurang Pakistan pa lamang, umaabot na sa 600 katao ang napapatay ng mga *drone* mula noong Agosto 2008.

Tigil ngayon ang operasyon ng base at idinetine ang umaabot sa 150 manggagawa nito na karamihan ay mga Afghani.

Nakapuslit papasok sa base militar ang *suicide bomber* na nirekrut sana ng CIA para gawing impormer. Pinasabog niya ang dalang bomba sa *gym* ng base.

**ANG****Bayan**

Pahayagan ng Partido Komunista ng Pilipinas  
Pinapatnubayan ng Marxismo-Leninismo-Maoismo

Taon XLI Blg. 1  
Enero 7, 2010  
[www.philippinerevolution.net](http://www.philippinerevolution.net)

*Editoryal*

## Itaas ang antas ng digmang bayan sa bagong dekada

**N**asa solidong katayuan ngayon ang Partido Komunista ng Pilipinas, Bagong Hukbong Bayan (BHB) at rebolusyonaryong mamamayan para maisulong ang digmang bayan sa bagong dekada sa antas na di pa nito naaabot sa nakaraan.


Pinakamatibay na batayan nito ang naipong lakas, karanasan at maging na tagumpay ng digmang bayan nitong nakaraang mahigit apat na dekada, at ang higit pa nitong pagkakapanday bunga ng matagumpay na pagharap at pagbigay sa sa tolong gera at Oplan Bantay Laya ng rehimeng US-Arroyo nitong katatapos na dekada.

Nagdudulot ng higit pang paborableng obhetibong kundisyon para sa ibayong pagsulong at malalaking pag-igpaw ng rebolusyong Pilipino ang pagkaka-sadlak sa depresyon ng pandaigdigang sistemang kapitalista at lalong pagkakabaon sa permanenteng krisis ng malakolonyal at malapyudal na sistema sa Pilipinas.

Determinado ang Partido at lahat ng rebolusyonaryong pwersa na gampanan ang mga tungkulin upang umigpaw nang malaki ang digmang bayan sa unang limang taon ng bagong dekada mula sa yugto ng estratehikong depensiba tungo sa estratehikong pagkatapat.

Sa pagharap sa malaking hamong ito, maraming paghahanda at pagsisikap ang dapat pursigidong isagawa ng lahat ng mga kadre, kasapi, mandirigma, aktibista at rebolusyonaryong mamamayan.

Una sa lahat, dapat higit na palakihin at palakas ang Partidong namumuno sa rebolusyonaryong kilusan. Dapat pag-ibayuhin ang pagrerekut laluna sa hahay ng mga manggagawa, iba pang masang anak-



***Mga tampok sa isyung ito...***

**Progresibong lider-masa, sumukob sa BHB**  
PAHINA 5

**Tropa ng 16th IB, inambus sa Quezon**  
PAHINA 6

**Hamon sa dominasyon ng dolyar sa Latin Amerika**  
PAHINA 10

## Mga instruksyon sa paglilimbag

**1.** Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

**2.** Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

**3.** Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa [angbayan@yahoo.com](mailto:angbayan@yahoo.com)